

La Lettre Jerriaise par Audrey Lucas. Janvyi 2025

Nou-s'-a d'la peine à craithe qu'un mais s'est passé dépis Noué et qué j'sommes presque à la fin du preunmié mais dé 2025. Lé mais d'Janvyi n'est pon trop populaithe auve un tas d'gens. Y'en a tchi lus pliaignent qué les séthées sont trop longues et tch'i' fait trop froid. Auprés tout l'excitement, les parties et les préparâtions pour Noué, i' faut r'muer et s'arrêtent toutes les décorâtions pour eune autre année. Les appartéments pathaissent vièdes quand lé bouais et et toutes les décorâtions et lumiéthes ont dispathu.

Y'a d'aut' monde tchi réalisent au mais d'Janvyi qu'il'ont dépensé trop d'sou sus Noué et sont au m'sespé pa'ce qu'i'n'savent pon comment qu'i's'en vont payi lus frais à l'av'nîn.

Bieau qu'j'avons passé le pus court jour dé l'Hivé au mais d'Dézembre j'n'avons pon acoueu hardi dé changement. Justement un p'tit mio sustout l'arlévée si j'avons du temps cliai. Quand j'tais mousse j'tais tréjous excitée auprès Noué pa'ce qué j'attendais fête pour man jour dé naissance au c'menchement d' Janvyi et pis bein vite auprès i' fallait r'quémenchi l'école.

I' n'y a pon d'doute qu'i' faisait bein pus d'froid dans chu temps-là et jé m'rappelle dé vaie la f'nêtre dé ma chambre g'lée en d'dans avec des dessins des p'tites fielles dé feûgiéthes.

Quand j'racontis ch't' expéthience-là à mes êfants, il' avaient d'la peine à l'craithe. I' n'pouvaient pon comprendre comment qu'nou pouvait vivre coumme chenna. Les gens oublient qué lé caûffage central n'tait pon dans presque toutes les maïsons comme au jour d'aniet. Nou-s'-avait un feu dans un appartément et p'têt, comme nous, y'avait un AGA dans la tchuïsinne tchi caûffait l'ieau et tchuïsait les r'pas.

Eune aut' chose qué j'mé rappelle dé ches temps-là 'tait lé trajet du Vaux d'la Mare jusqu'en Ville par la beusse. I' fallait ramonter lé Mont Jubilee tchi 'tait souvent couvèrt dé g'lée. Êtant mousses j'trouvêmes qué ch'tait si excitant quand nou sentait la beusse drisser sus la gliache.

J'n'avêmes autcheune idée tchi responsabilité qué l'pouôrre cacheux avait pour nos garder saufs. Eune fais à la station, i' fallait ramonter Mulcaster et Hill street, ieune des pus fraides plaiches en Ville. Lé vent d'Êst souffliait ava la route et i' fallait s'combattre jusqu'à la Colomberie. Jé m'rappelle dé ch'na comme si ch'tait hièr. Dans des temps y' avait trop d'né pour la beusse à traffitchi jusqu'à siez nous et d'même nou n'pouvait pon aller à l'école.

Si lé temps n'tait pon trop froid nou c'menchait à vaie du r'muage dans les clios sustout si y'avait pon ieu trop d'plyie avau les s'maines. Les raies 'taient p'têt ouvèrtes et les côtils fouis pour plianter les preunmié patates. I'n'y a pon grande activité dans l'gardîn tout pathait endouormi mais nou sait bein qué les preunmié flieurs qué nou s'en va vaie pèrchi la tèrre es'sont les p'tites bouonnes femmes. J'en ai dans l'pré lé long du canné et touos l's ans y'en a dé pus en pus.

Lé mais d'Janvyi peut être froid et nou peut aver du temps couvèrt mais quand nou-s'-a des bieux jours auve tout pliein d'solé, oh, la jouaie! Ch'est un pliaïsi d'être d'houors p'têt pour faithe eune pronm'nade auve lé tchian ou avec des anmîns. Et comme touos l's aut' mais i' s'en va dispathaître à grande vitesse.

À la préchaine